

107 年全國語文競賽原住民族語朗讀【海岸阿美語】 國中學生組 編號 2 號

O caayay katawal ako a romi'ad

Harateng han no mako ko itiyaay ho a 'orip, ira ko malecaday pinacedet noya kahengangay ho a marad ko fanges, tangasa anini caayay ho kalahedaw ko kaci'angi no faloco'; o roma i, ira ko malecaday to nika sonol no mimingay a nanom lahedaw lahedaw sa, sa haraterateng han awaay to maharateng. O mirakatan to i 'orip a lalan, matiya to o nika fangsis no epah, fengiw sa a masanek, anoca eca ka tenes maharateng i faloco' konini, nika itini i rakat no 'orip i, o tada safangcalay maharateng i faloco'.

Tosa folad ko pahanhan no mitiliday tona kaciherangan, o mamitilid to kawcong a pitilidan no roma a miheca, orasaka caayay pahanhan ko pitilidan. I'ayaw no kailisnan a dadaya, milongoc papihakelong minokay mikapot to ilisin no niyaro' ko ina no mako. Adihay ko tatiliden itiya, sapina'ayan awaay ko pakayraan a mina'ay. Dafak maratar mikalic to cinamalay, kalahokan tangasa to i loma' ni ama, nengneng han 'aloman ko milininaay mahaholoholol. Maherek miholol cangraan i, tengteng sato ko wina ako tayra i kalikodaan mirarakat, itiya to misatapang pasifana ko wina ako to pakayniay i ilisin a demak. Padeteng sa pasifana', ano masakero to dadaya samanen a mikayat ko kamay, o wa'ay ato tatirengan samanen a palecad saan, nika awaay ko cecacecay maparo i fongoh ako.

Ira ko limecedan ato pakarongay mihatatanam a masakero i kalikodaan, tangasa kami itira papikapot ko wina ako cangranan masakero, caay ka kahi kako. Wata ko keter no wina ako to kaca pitengil to sowal nira, orasaka malaliyang kami a tatos. Sowal han no mako ko wina ako, "Naw patangic han kako to ka'osian no mako a demak" paca'of sa cingra, "Caayay ko patangic ako kisowanan konini, nawhani, onini i, o tada tatamorongen no malaPangcahay konini, mara'od to ko mihecaan iso, orasaka onini i, todongay to o tato'oren no miso, naw no caayay ka kahi kiso sao?"

"Caayay ka itini masofoc a mato'as kako" han no mako a somowal, "Cima kiso? na icowaay kiso" saan a maketer, "Naw patangic han kako?" hanako a langiwngiw ko wina ako ya naikoran nira a mikaketer. Pisakalafian to, papitanam to ci ama mica'edong toya misanga'an nira a losid. Pasowal sa, "pafelien to ako kiso to malo losid iso, ka'imeren a misalimela tangasa i kalitengan iso!" saan. Pakao tadamaanay a dafong ko pinengneng ni ama tona losid a maceki ko faloco' no mako, mato pifengiw to nika fangsis no epah, mana hatira to ko kalimela nira, harateng han edeng i kailisinin aca a cicaedong, itiya to maharateng ako koya sowal no wina ako, "Cima kiso? Na icowaay kiso?" sanay a sowal.

Dadaya sato makakayakayat to a masakero, ya ifecangay ho a wa'ay ato tatelecan sa kowaming sato, mahakelong to ko faloco' sa lipahak sato. Itini i kalikodaan to a manengneng ko kalacecay a marikec no finacadan, ya keter no faloco' fasaw sato, mahapinang to no mako koya sowal ni ama. Makafana' to no mako ko ilisin hananay a demak, malasaka kadofah no 'orip. O hadoway no faloco' ako, mararaway kako, tada miaray kako ina to pikerid no miso i takowanan a mikapot to ilisin no niyaro'.

107 年全國語文競賽原住民族語朗讀【海岸阿美語】 國中學生組 編號 2 號

最難忘的一天

2個月的暑期，豐年祭前一晚，媽媽要我和她去參加。作業很多，卻無法拒絕。隔天中午到外婆家。媽媽帶我去祭場，和我講述豐年祭的點滴，教導大會舞蹈，我卻一點也記不住。

會場前有一些少女在練舞。媽媽要我一起跳，我拒絕了。我說：「為什麼要逼我做不喜歡的事？」媽媽說：「這是你的義務。是我們阿美族人最重要的責任。」我說：「我又不在這裡長大。」媽媽說：「你是誰？你從哪裡來？」我望著她生氣離去的背影說：「為什麼要逼我？」

傍晚，外婆要我試穿她做的衣服。外婆說：「我將財富交給你，你要好好珍惜它！」我覺得很震驚，只是一件祭典穿的衣服，為何那麼重視？我想起母親的話—你是誰？你從哪裡來？

晚上和大家手牽手跳舞，腰和腳從僵硬到柔軟，內心也逐漸愉悅。族人的心團結一致，內心開始明白外婆說的話。我領悟豐年祭是阿美族獨有的文化，生命因此豐富完整。感謝媽媽帶我參加部落豐年祭。